

Don Juan d'mon keûr !

Comédie en 1 acte de Joëlle Delahaut et Philippe Decraux

Personnages

- Valentin +/- 17 ans
- Nathalie +/- 16 ans, sœur de Valentin
- Margot +/- 12 ans, sœur de Valentin
- Léa +/- 15 ans, sœur de Valentin
- Vanessa +/- 16 ans, petite copine de Valentin
- Christelle +/- 16 ans, petite copine de Valentin

Décor

La pièce se déroule dans un salon (agencement au choix du metteur en scène). Il faut au minimum :

- un canapé
- une télévision
- une table de salon
- une armoire ou une étagère avec quelques bouteilles

Pour obtenir l'autorisation de représenter, de traduire, de reproduire ou de lire en public tout ou partie de cette pièce, s'adresse à la SABAM.

(Au lever du rideau, Margot et Léa son en pyjama, vautreées dans le canapé. Elle regardent la télévision en mangeant des chips et en buvant du coca.)

Scène 1
Valentin, Margot, Léa

Valentin : (entrant) Alèz lès fîyes ! Il èst tims asteûre d'alér vos couchât !

Margot : (sursautant) Couchât ?

Léa : In vèrdi ?

Margot : A sèt' eûres et d'mîye ?

Valentin : C'n'est nèn l'momint d'fér dèl powésiye ! Ramassèz vos clic èt vos clac èt... « Au lit on dort »...

Margot : Mins pou qui ç'qui vos vos pèrdèz, vous ?

Léa : Oyi, vos n'astèz nèn l'chèf, droci !

Valentin : Papa et maman sont st-èvôye pou l'wékèn' et dji seûs l'pus vî. Adon, c'èst bèn mi qu'èst l'chèf !

Margot : In chèf a rén, oyi !

Valentin : Dj'é prom'tu a maman qu'vos-irîz vos couchât timpe tous lès djoûs. Adon, vos-avèz trwès munûtes pou yèsse dins vo lét, sinon...

Margot : Sinon qwè ?

Léa : Vos-alèz nos donér ène pètéye ?

Margot : C'èst l'vré, çoula ! Qwè ç'qui vos-alèz nos fér ? Nos djonde azârd ?

Léa : Nos donér ène pûnicion, come a lès-èfants ?

Valentin : Riyèz, riyèz... mins dji poureûs ètout racontér saquants-afêres aus parints...

Margot : Di qwè « saquants-afêres » ?

Valentin : Par ègzimpe... (à Margot) Qui vos-avèz signî vous-min.me vo n'intérogacion d'câcul l'samwène passéye tél'mint qu'vos pwints èstît bias... Eyèt vous (à Léa) qu'vos avèz skètè l'pus bia vase di maman et qu'vos lî avèz racontè qu'c'èsteût l'tchat qui l'aveût fér tchér !

(Les deux filles sont consternées)

Margot : Lèbon, lèbon... Nous, tout ç'qu'on vouleût, c'èsteût d'alér couthî ène dèmi-eûre pus taurd...

Valentin : L'idéye n'èst nèn mwéche après tout... C'èst qui... dj'é ètout prom'tu a maman qu'i gn-areût pont d'dèlûje droci... Dji vos lèye ène dèmi-eûre di pus... Come ça, vos-arèz l'timps d'fèr lès bidons divant d'alér vos couthî !

Léa : Mins nous-outes, nos n'avons rén prom'tu a maman !

(D'un geste du doigt, Valentin leur indique fermement la sortie. Les deux filles sortent en râlant et en laissant chips et verres de coca sur la table.)

Scène 2 : Valentin

Valentin : Asteûre qu'èles-ont disbarassî l'plantchî, dji m'va d'alér prinde in bon bin pou m'aprèstér a m'swèréye...

(Il fait mine de quitter la pièce puis se ravise.)

Valentin : Mins d'avant ça, dji m'va prinde ène saqwè d'fôrt... Papa dit toudis qu'i gn-a rén d'tél' pou s'mète en trin !

(Il va vers le bar et se sert un grand verre de whisky.)

Valentin : Après tout, i parèt qu'c'èst fèt avou dès plantes, ça n'sareût nèn m'fèr du mau... Qui du contrère !

(Il boit un grand coup et manque de s'étouffer, il tousse, etc...)

Valentin : Ah ça, pou tchaufér, ça tchaufe !

(Il contemple le verre à moitié vide puis...)

Valentin : Mins come dit papa ètout, i faut toudis alér d'jusqu'au d'bout d'ses-èfôrts !

(Et il vide le reste du verre. Tandis qu'il boit, Nathalie fait son entrée... Surpris, Valentin dépose son verre en catastrophe.)

Scène 3 : Valentin, Nathalie

Valentin : (s'étranglant) Qwè ç'qui vos f'yèz là, vous ?

Nathalie : (ironique) Dji d'meure droci, savèz... Vos n'vos rap'lèz pus ?

Valentin : Ca, dji l'sés bén ! Dji v'leûs dire : qwè ç'qui vos f'yèz "d'djà" là ? Dji pinseûs qu'vos d'vîz d-alér au cinéma avou vo galant...

Nathalie : Oyi, mins dj'é candjî d'avis !

Valentin : Pouqwè ? Vos vos-avèz disputè tous lès deûs ?

Nathalie : Non fét ! Mins c'vaurén-là n'aveût nén d'djà l'premî euro pou payî m'place au cinéma...

Valentin : Mins si c'n'èst qu'ça, dji pous vos l'payî, mi, l'place... Tènèz... (il sort un billet de sa poche) Dîj' euros, ça ira ?

Nathalie : C'èst bén djinti d'vo paurt mins... dji dwès r'fûzér ! C'èst st-ène kèstion d'principes ! Dji seûs l'djon.ne fîye, il èst l'djon' ome... C'èst st-a li d'payî m'place !

Valentin : Qwè ç'qui c'èst d'ça pou dès-idéyes d'ènwère ? Vos n'avèz jamés ètindu pârlér du "féminisme", vous ? D'l'égalité dès sekses ?

Nathalie : C'èst bon pou lès-outes, tout ça ! Pour mi, ène feume, c'èst st-ène feume et in'ome, c'èst st-in'ome !

Valentin : Mins a mi, ça n'fét nén mes-afêres... Bén qui... Tout compte fét, c'n'èst nén pus mau qu'vos fûchîje rintréye pus timpe...

Nathalie : Pouqwè ? Dji vos manqueûs dèdjà ?

Valentin : Oh non fét, ça n'pout mau ! Mins lès deûs tchawètes sont dins l'cujène pou l'momint en trin d'fêr lès bidons et i n'faureût nén qu'ça trin.ne trop longtims... Vos-alèz lyeû boutér in côp d'mwin !

Nathalie : Et pouqwè ç'qui vos n'alèz nén vous min.me lyeû boutér in côp d'mwin ?

Valentin : Pac'qu'in'ome, c'èst st-in'ome et qu'ène feume, c'èst st-ène feume ! C'èst bén ç'qui vos v'nèz d'dire i gn-a nén cénq munûtes !

Nathalie : Et vos pinsèz qu'ça va d-alér come ça, vous ? Qu'vos-alèz m'donér dès ôrdes et qui dji m'va vos choûté come in p'tit tchén ?

Valentin : C'èst st-a dire qui... papa et maman n's'rît nén fôrt contints d'aprinde qui, l'samwène passéye, vo galant èst d'meuré djusqu'a mèniût dins vo tchambe...

Nathalie : Vos n'ôz'rîz tout l'min.me nén...

Valentin : Mi, dins ces cas-là, dj'é tous lès courâdjès...

Nathalie : Ah mins ça... ça va s'payî !

Valentin : Alèz, ravalèz vo ratchon ! Pac'qu'asteûre, il èst grand timps qu'dji vâye prinde m'bin...

Nathalie : Matcho qu'vos-astèz !

Valentin : L'place dès feumes, c'èst st-a l'cujène !

Nathalie : Landru ! Vos mèl pay'rèz, dji vos l'djure ! (Et elle sort en râlant.)

Scène 4 : Valentin

Valentin : Et co yène wôrs dès pîds ! Asteûre, dji m'va d-alér m'èscurer, mète du sint-bon èyèt m'fér tout bia pou m'chérîye...

(Il fait de nouveau mine de sortir, fait demi-tour et se sert un autre whisky qu'il avale en deux temps trois mouvements.)

Valentin : Après tout, on n'va jamés su ène djambe, en'do ?

(Et il sort.)

Scène 5 : Léa, Margot, Nathalie

(Léa, Margot et Nathalie entrent toutes les trois.)

Nathalie : L'vaurén, i nos-a bén yeû mins tout çoula, i nos l'pây'ra !

Léa : Mins pou qui ç'qui s'prind, hon, c'ti-la !

Margot : On a bén l'drwèt d'profitér dèl maujone come li quand papa et maman n'sont nèn là !

Léa : Tout çoula pac'qui mossieû vout d'meûrér tout seû avou s'coumère...

Margot et Nathalie : Qwè ?!

Léa : Bén oyi ! Dji l'é ètindu t'taleûre : i lyî a téléphoné pou lyî dire qui lès parints èstît st-èvôyes, qu'il asteût tout seû et qu'i l'inviteût a v'nu passér l'swèréye droci.

Nathalie : Vos d-astèz sûre ?

Léa : Bén oyi qu'dji d-è seûs sûre ! R'wètèz, s'téléfone èst d'meuré là... Et dji l'ètinds co : (Elle imite Valentin.) « Vanessa chérîye ! Mes parints n'sont nèn là audjourdû et dji seûs tout seû al maujone... Ca m'f'reût tél'mint pléjî

si vos astîs là a costé d'mi... Vos v'lèz bén v'nu ?... Oh, mèrci Vanessa chérîye... Dji seûs tél'mint binauje... »

Nathalie : Vanessa ? Il a dit Vanessa ?

Léa : Oyi. Dj'é dins l'idéye qu'c'est come ça qu'èle si lome, s'coumère ?

Nathalie : Non fét, djustumint ! S'coumère, èle si lome Christelle !

Margot : Il a p'tète candjî ?

Nathalie : Ayèr, il asteût co toudis avou Christelle dins tous lès cas ! Dji lès-é vèyûs...

Léa : Il a kék'fîye deûs coumères, li ?

Margot : Il èst co pî qu'dji nèl pinseûs ! Qué coureû a fîyes !!

Nathalie : Au contrère, lès fîyes, c'est tout bon pou nous-utes... Dji pinse qui dj'é trouvé in plan pou nos r'vindji toutes lès trwès ! Eyu ç'qu'i l'èst, s'téléfone ?

Léa : Qwè ç'qui vos-alèz fér ?

Nathalie : Vos-alèz vîre...

(Elle prend le GSM de Valentin et compose un numéro.)

Nathalie : Alô ? Christelle ? Bondjoû ! C'est Nathalie, droci, l'cheur da Valentin. Oyi, ça va bén èyèt vous ? Dijèz, Christelle, nos parints sont st-èvoûyes pou l'wékèn' et mes cheurs èyèt mi, nos-alons fér ène sôrtîye intrè fîyes... Seûl'mint, nos-avons 'ne miyète mau no keûr pou Valentin qui va d'meurér tout seû droci... Vos n'pourîz nèn v'nu passér l'swèréye avou li ? Ca lyî f'reût tant pléjî èt ène bèle surprîje au d'zeû du martchî... C'est possipe ? Vos s'rèz là dins dî munûtes ! C'est formidâbe, Christelle ! Nos vos ratindons... (Elle raccroche.)

Nathalie : Et d'yène ! A qué n'eûre èst-ç'qu'il a dit d'passér a Vanessa ?

Léa : Vièz lès wit' eûres et d'mîye...

Nathalie : Tout djuste, èles vont arivér toutes lès deûs èchène !

Margot : Ouh ! Ca va yèsse l'corida, droci !

Léa : Eles vont l'mindjî tout crû !

Nathalie : Oyi... Mins asteûre, nos d'vons nos-organizér : vous, (A Léa) vos-alèz montér l'gârde al fènièsse... I faut fèt intrér lès fîyes sins qu'èles ni duv'nut sonér sinon ça va donér l'alèrte au grand via! Eyèt vous, (à Margot) vos vos postèz a costé dèl sale di bin... Si vos-ètindèz du brût ou qu'vos pinsèz qu'i va vudî, vos diskindèz quate a quate nos prév'nu! Compris ?

Léa et Margot : A vos-ôrdes, chèf !

(Elles gagnent leur poste.)

Scène 6 : Nathalie

Nathalie : Bon, asteûre qui tout èst st-arindjî, dji m'va r'mète ène miyète d'alûre droci... Ca mèt'ra l'aute coquia d'boûne umeûr et insi i n'si dismèfiy'ra nèn...

(elle débarrasse la table des verres et des chips qu'elle reporte à la cuisine. Elle réapparaît très vite.)

Scène 7 : Nathalie et Léa

Léa : Nathalie ! Yène dès deûs fîyes vént d'passér l'bârièrre !

Nathalie : Dimeûrèz calme, Léa ! Vos-alèz l'fêr rintrér paujèr'mint droci et quand l'aute ariv'ra, vos f'rèz l'min.me avou lèye. D'acôrd ?

Léa : Oyi, Nathalie ! Dj'é compris ! (Elle sort et reparait aussitôt avec un jeune fille.)

Scène 8 : Nathalie, Vanessa, Léa

Nathalie : Ah, bondjoû Vanessa !...

Vanessa : Bondjoû...

Nathalie : Oh, mins dijèz... dji vos r'mèts asteûre : vos astèz l'fîye qui boute al pizzéria dèl Grand-Ruwe ?

Vanessa : Oyi, c'èst bén mi...

Nathalie : Ah bén, dji comprinds asteûre ! Ca fèt dès samwènes qui dj'vos wès donér dès rawètes di fromâdje a m'frère, sins qu'i pâye ène djike ! Dji m'dimandeûs Bén c'qu'il aveût fêr pou méritér çoula...

Vanessa : I l'mérite Bén, savèz... Il èst tél'mint djinti...

Léa : Faut d-alér râde pou l'dire !

Vanessa : Et avou ça, il èst tél'mint sérieûs ! Toudis a l'eûre aus z'è rendèz-vous, romantique, atincioné...

Léa : Dijèz, vos astèz bén sûre qui c'èst no frère qui vos con'chèz, vous ?

Vanessa : Oyi... enfin... i m'chène a vire dins tous lès cas...

Nathalie : Oyi, oyi, c'èst bén li... Mins, dijèz Léa, vos n'avèz nèn ène saqwè a fér, vous ?

Léa : (se sauvant) Oyi, oyi, Nathalie !

Scène 9 : Nathalie, Vanessa

Vanessa : Et bén ! Vos 'nn'avèz d'l'autorité su vo cheur !

Nathalie : C'èst pus râde qui nos nos-ètindons bén et qu'èle vout m'fér pléjî...

Vanessa : Et avou Valentin ? Vos vos-ètindèz bén ètout ?

Nathalie : Candjons d'sudjèt, si vos v'lèz bén... Ca vaureût mieûs !

Vanessa : C'èst qui... c'èst st-ène saquî d'bén, savèz, vo frère !

Nathalie : Dji vous bén vos crwère, vous !

Scène 10 : Nathalie, Vanessa, Léa, Christelle puis Margot

(Léa entre suivie de Christelle.)

Nathalie : Ah, bondjoû Christelle !

Christelle : Bondjoû, Nathalie...

Nathalie : Vos d-è f'yèz 'ne drole di tièsse...

Christelle : C'èst qui dji seûs st-ène miyète sbarée d'vos vire Léa èyèt vous. Dji pinseûs qu'i gn-areût nulu droci... Enfin, dji pinseûs qu'i gn-areût qui...

Nathalie : (lui coupant la parole) Ah ça ! Vos n'avèz nèn co vo compte di surprîjes, m'pètite Christelle...

Christelle : Qwè ç'qui vos v'lèz dire ?

Nathalie : Pou n'nén fér trop long : Christelle, dji vos prézinte Vanessa, l'coumère di no frère... Vanessa, dji vos prézinte Christelle, l'coumère di no frère...

Christelle : Vos-avèz deûs frères ?

Léa : Pou fér co pu simpe : (Elle fait les présentations.) Vanessa, l'coumère da Valentin. Christelle, l'coumère da Valentin !

Vanessa : Dji n'comprinds nèn...

Léa : No frère a deûs coumères : vous èyèt vous !

Christelle et Vanessa : Nén possipe !??

Christelle : (A Vanessa.) Vos m'avèz scroté m'galant !

Vanessa : (A Christelle.) Mins dji n'é rén scroté du tout, mi ! Valentin èyèt mi, c'est st-ène vréye istwêre d'amoûr...

Christelle : Ene istwêre d'amoûr ? Tu va vîre ça, ène istwêre d'amoûr...

(Les deux filles commencent à se quereller bruyamment, les mots « rosse », « gârce », « voleûze »... fusent dans la dispute.)

Nathalie : Ca s'ufit, vous deûs !

(Les deux filles s'arrêtent net.)

Nathalie : Vos n'avèz nèn compris qui l'coupâbe dins c'n-afêre-ci, c'est Valentin ?

Vanessa : Ele a rézon ! Nos f'rîs bran.mint mieûs d'cachî après ène solucion pou s'èrvindjî èchène pus râde qui d'nos cachî mizère !

Nathalie : Djustumint, djî é d'djà pinsé !!

Léa : Et c'est pou çoula qu'on vos-a fét v'nu droci èchène... Alèz, Nathalie : dijèz-lyeû vo n'idéye...

Nathalie : Et Bén v'là...

(Les filles se regroupent et Nathalie explique son plan à voix basse.)

Nathalie : Et adon ? Qwè ç'qui vos d-è pinsèz ?

Christelle : L'idéye èst boûne ! Dji pinse qu'on va Bén s'amuzér !

(A ce moment, Margot arrive en courant.)

Margot : Atincion ! Il arive !

Nathalie : Alèz, chakeune a s'posse !

(Toutes quitte la pièce sauf Vanessa.)

Scène 11 : Vanessa, Valentin

Valentin : (entrant) Vanessa ! Qué boûne surprîje ! Il èst d'djà wit' eûres et d'mîye ?

Vanessa : Oyi, m'chéri ! Dj'èsteûs tél'mint d'su dès tchaudès bréjes pou vos r'vîre...

Valentin : Oh, mi ètout, m'pètit lapén ! Mi ètout ! Dji seûs binauje come in bossu ! Hic ! (Il a un hoquet.) Vènèz, achîdèz-vous là, dins l'canapé èyèt mètèz-vous a vo n'auje...

(Vanessa s'assied, déposant son sac sur la table.)

Vanessa : Dji sins qu'nos-alons passér ène boûne swèréye, rén qu'nous-outes deûs...

Valentin : Mi ètout, dj'èl sins, m'pètit keûr... Hic !

Vanessa : Ca n'va nén, Valentin ? I m'chène qui vos f'yèz Bén dès droles di brûts...

Valentin : C'èst d'vos vîre là, Vanessa... C'èst l'émocion...

Vanessa : C'èst pou ça ètout qu'vos astèz tout roûdje ?

Valentin : Oyi... C'èst sûr'mint pou ça ètout...

Vanessa : Vos d'vrîz putète bwère ène saqwè pou vos r'mète d'alure ?

Valentin : C'n'èst nén 'ne mwéche idéye, téns, ca... Dji m'va nos quér deûs vêres di coca ! Ca vos va ? (Il se lève et quitte la pièce.)

Scène 12 : Vanessa, Christelle, Nathalie

(Dès qu'il est sorti, Vanessa se précipite vers l'endroit où sont dissimulées les autres. Vanessa doit absolument reprendre son sac.)

Vanessa : Eh vous-outes ! Ca î èst : il èst st-èvôye dins l'cujène !

Nathalie : (introduisant Christelle) Alèz Christelle ! C'èst st-a vo toûr asteûre ! Et n'roubliyèz nén tout ç'qui nos-avons conv'nu, en'do...

Christelle : Pont d'danjér, chèf ! Dj'é tout dins m'tièsse !

(Elle prend place au même endroit que Vanessa quelques secondes plus tôt et dépose son sac sur la table.)

Scène 13 : Christelle, Valentin

Valentin : (entrant, un verre de Coca dans chaque main) Mè'vlà r'vènu, m'pètit pouyon... (Voyant Christelle, il stoppe net. Il se met à bégayer.)
Christelle ?? Qwè ç'qui vos f'yèz là ??

Christelle : Comint qwè ç'qui dj'fés là ? Bén, dji vos ratinds, Valentin... Enfin, dji vos ratinds avou m'vêre di coca...

Valentin : Pac'qui l'vêre di coca, ç'asteût pour vous ?

Christelle : C'est c'qui vos m'avèz proposé gn-a deûs munûtes, dins tous lès cas ! Yin pour vous èt yin pour mi !

Valentin : Ah bon ?!

Christelle : Vos n'vos souv'nèz pus ? Dji vos-é min.me consyî d'bwère ène saqwè pou vos r'mète d'alure tél'mint qu'vos-astîz roûdje...

Valentin : (peu convaincu) Dji m'souvéns, come d'èfèt, dji m'souvéns... Hic !

Christelle : Vos n'avèz nèn l'èr fôrt bén, Valentin... Vos v'lèz qui dj'vos lèye tout seû ?

Valentin : Non fét, non fét... Dimeûrèz seûl'mint ! Ca va passér...

Christelle : Dji l'èspère bén ! C'est qui... dj'é bran.mint dès projèts pou l'swèréye, savèz mi... Wétèz ! Dj'é mètu èsprès m'pètit pull rôse pou vos fèr pléjî...

Valentin : Vos vos souv'nèz qui l'rôse asteût m'couleûr préférée ? Come c'est djinti...

(Il se penche pour lui faire un bisou. Christelle se dérobe, prend son verre et boit une gorgée.)

Christelle : Oh, l'coca èst st-ène miyète tchaud... Vos n'arîz nèn saquants glaçons ?

Valentin : Dji m'va m'okupér d'ça su l'côp... Dj'arive tout d'chûte...

(Il prend le verre de Christelle et sort vers la cuisine. Christelle prend son sac et se précipite vers les autres.)

Scène 14 : Christelle, Vanessa

Christelle : Râde, râde ! Pèrdèz m'place ! I n'va nèn taurdjî !

Vanessa : Dji m'dispétche ! (Christelle sort en vitesse.)

Scène 15 : Vanessa, Valentin

(Valentin entre et se fige sur place en voyant Vanessa. Il pousse un cri.)

Vanessa : Valentin ! Qwè ç'qui s'passe ? Vos d-è f'yèz yène di tièsse ?

Valentin : Mi ? Oh, non fét, non fét... C'èst tél'mint qu'dji seûs contint d'vos vîre là !

(Il s'assied mais tire une drôle de tête.)

Vanessa : Oh, come vos astèz djinti, Valentin ! Wétèz, dj'é mètu m'pètit pull bleû pour vous... rén qu'pour vous...

Valentin : Vos vos souv'nèz qui l'rôse asteût m'couleûr préférée ? Enfin, dji vous dire l'bleû ! L'bleû !

Vanessa : L'rôse, l'bleû... C'èst pus râde tout vèt' qui vos astèz pou l'momint, Valentin !

Valentin : Vos trouvèz ?

Vanessa : Vos n'avèz vrémint nén l'èr bén ! Vos d'vrîz putète mindjî ène saqwè asteûre ?

Valentin : Vos-avèz p'tète rézon... Ca vos direût in boukèt d'pizza ?

Vanessa : Avou dès-anchwas ?

Valentin : Oyi, avou dès-anchwas, si vos v'lèz...

Vanessa : Avou pléjî...

Valentin : Dji m'va vos quér ça...

(Et il sort.)

Scène 16 : Vanessa, Christelle

Vanessa : Alèz, Christelle... et boûn' apétit !

Christelle : Mèrci !

(Vanessa sort en oubliant son sac sur la table. Christelle prend sa place et pose son sac à côté de celui de Vanessa.)

Scène 17 : Christelle, Valentin

(Valentin entre, 2 parts de pizza en mains.)

- Valentin : Et deûs boukèts d'pizza, deûs ! (Voaynt Christelle) Oh, mon dieû ! C'a co toudis candjî !
- Christelle : Qwè ç'qui vos d'jèz ?
- Valentin : Dji pinse qui vos-avèz réson, savèz... Dji n'mi sins nèn bén... I m'chène qui dj'wès dès-afêres qui n'faut nèn... Dji n'é pus m'tièsse a mi !
- Christelle : Tèjèz-vous et achîdèz-vous ! Mindjèz pus râde in p'tit boukèt d'pizza, ça vos pas'ra...
- Valentin : (s'asseyant) Dji pinse qui c'est dins m'tièsse qui ça n'va nèn ! Dji comince a piède mes boubounes...
- Christelle : (prenant son morceau de pizza) Mins, a propos, Valentin... vos n'avèz nèn dèl pizza sins pont d'anchwas ?
- Valentin : Mins... i gn-a céng munûtes, c'est vous qui m'avèz d'mandé dès-anchwas su vo pizza !
- Christelle : Jamés d'la vîye ! Dji n'in.me nèn lès-anchwas, dji wès évî lès-anchwas !
- Valentin : Oh, mins... dji m'î r'trouve pus, mi, dins mes-idéyes... On direût qui m'tièsse va pèté...

Scène 18 : Toutes les filles + Valentin

(Entrée des filles sur la dernière tirade de Valentin, Christelle rejoint le groupe.)

- Vanessa : Si èle ni pète nèn toute seûle, nos lyî bout'rons in côp d'mwin...
- Valentin : Vanessa ?! Co toudis in mirâje ? C'est l'wiski ! C'est sûr'mint a cauze du wiski ! (Avisant les deux sacs identiques, il les prend en mains.) Ca î est ! Dj'é l'bèrlûwe asteûre ! Oh, mon dieû... Dji sins qu'dji m'va yèsse malâde...
- Toutes les filles : Bén fêt !
- Valentin : (s'allongeant dans le canapé) Dji sins qu'dji m'va rinde l'âme...
- Nathalie : Et quand vos-arèz fini d'rinde l'âme, gn-a dès bidons qui vos ratind'nut ! (Elle lui tend une brosse à vaisselle qu'elle laisse tomber sur lui dans le canapé.)

Margot : Après, gn-ara ètout dèss poussières a brouch'tér ! (Elle laisse tomber un plumeau à poussières.)

Léa : Et co in p'tit côp d'loque a donér ! (Elle dépose un balai sur lui.)

Nathalie : Asteûre, nos vos lèyons !

Margot : Pac'qu'aujourdû...

Léa : L'place dèss feumes...

Vanessa : Ele èst st-a l'pizzèria !

Christelle : Avou ou sins-anchwas !

Toutes : Arrivèdèrci Don Juan d'mon-keûr !

(Et elles sortent.)

RIDEAU

(sur la musique « Macho Man » de YMCA)